

Ведати подобает, яко праздник Святых Богоявлений
в кийлюбо день случится, поем

ПОВЕЧЕРИЕ ВЕЛИКОЕ СИЦЕ:

О часе 10-м ноши (в 4-м часу ноши – А.Р.) бывает благовест, и потом трезвон во вся кампаны. Иерей же со диаконом облекшеся творят начало, якоже во вся праздники Владычни. Диакон глаголет: Благослови, владыко. Иерей: Благословен Бог наш: и кадящу иерею, глаголем Повечерие великое от начала: Слава Тебе, Боже наш, слава Тебе. Царю Небесный: Трисвятое: и прочая.

С нами Бог: поем с пением, и вместо тропарей обычных,

Просвети очи мои: глаголем тропарь праздника.

ТРОПАРЬ ПРАЗДНИКА, ГЛАС 1:

Во Иордане крещающуся Тебе Господи, / Троическое явися поклонение: / Родителей бо глас свидетельствоваше Тебе, / возлюбленного Тя Сына именуя: / и Дух в виде голубине, / извествоваше словесе утверждение, / явлейся Христе Боже, // и мир просвещей слава Тебе.

И вместо, Помилуй нас, Господи, помилуй нас: глаголем кондак праздника.

КОНДАК, ГЛАС 4.

Явился еси днесь вселенней, / и свет Твой Господи знаменася на нас, / в разуме поющих Тя: / пришел еси и явился еси, // Свет неприступный.

По Слава в вышних, бывает лития по обычаю.

НА ЛИТИИ СТИХИРЫ САМОГЛАСНЫ, ГЛАС 4.

[Космы монаха:]

Одевайся светом яко ризою, / нас ради по нам быти сподобился есть, / во струи одевается днесь Иорданския: / не Сам сих ко очищению требуя, / но нам Собою устраивая порождение. / О чудесе! без огня изваряет, / и назидает без сокрушения, / и спасает в Него просвещаемыя, // Христос Бог и Спас душ наших.

Тебе в Дусе и огни очищающа грех мира, зря Креститель грядуща к себе, ужасаяся и трепеща, вопияше глаголя: не смею держати верх Твой пречистый. Ты мя освяти Владыко, Божественным явлением Твоим, Едине Человеколюбче.

Приидите подражаем мудрыя девы, приидите срящим явльшагося Владыку: яко прииде, яко Жених ко Иоанну. Иордан видев Тя убояся и пожда, Иоанн вопияше: не смею держати верха Безсмертнаго. Дух низхождаше в виде голубине освятити воды, и глас с небесе: Сей есть Сын Мой, пришедый в мир спасти род человеческий, Господи слава Тебе.

Крещается Христос, и восходит от воды совозводит бо с Собою мир, и зрит разводящаяся небеса, яже Адам затвори себе и сущим с ним. И Дух свидетельствует Божество: подобному бо предтичет и глас от небесе: оттуду бо свидетельствуемый Спас душ наших.

Трепеташе рука Крестителява, егда пречистому Твоему верху коснуща: возвратися Иордан река вспять, не дерзая служити Тебе: яже бо устыдеша Иисуса Навина, како Творца своего устрашитися не имяше? Но все исполнил еси смотрение, Спасе наш, да спасеши мир явлением Твоим, едине Человеколюбче.

Слава, глас 8: [Иоанна монаха:]

Господи, исполнили хотя, / яже уставил еси от века, / от всея твари служители тайны Твоея приял еси: / от ангел Гавриила, от человек Деву, / от небес звезду, и от вод Иордан, / в немже беззаконие мирское потреби еси, // Спасе наш, слава Тебе.

И ныне, глас тойже: [Анатолия:]

Днесь всяка тварь просвещается, / днесь всяческая веселятся, / небесная вкупе и земная, / ангели и человецы смешаются: / идеже бо Царево пришествие, и чин приходит. / Тецем убо на Иордан, и видим вси Иоанна, / како крещает верх нерукотворенный и безгрешный? / Темже апостольский глас припевающе, согласно возопийм: / явися благодать Божия, спасительная всем человеком, // озаряющи и подающи верным велию милость.